



Lëtzebuerguer
Guiden a Scouten

Aarbechtsgrupp Nohaltegkeet
nohaltegkeet@lgs.lu



Checklëscht Nohaltegkeet



Ekologesch op enger gréisserer Aktivitéit



E grouse Merci un eis Sponsoren

lalux^e

VOYAGES
VANDIVINIT
Les Vacances de l'Alsace

BIL





D'LGS hunn sech als Zil gesat méi nohalteg ze ginn. Mee wat heescht dat genau a wéi soll all eenzele Grupp, Trupp, Chef oder Member dat op enger gréisserer Aktivitéit ëmsetzen?

Dës Checklëscht soll dir konkret dobäi hëllefen. Begleet gëtt d'Checklëscht vun enger Rei Fichen, déi Tipps zu dëse verschiddene Punkte ginn a viles méi am Detail erklären. D'Fiche fënns du an denger Chefbox am Desk bei der AG Nohaltegkeet ënnert „Nohaltegkeet um Camp“.

Nohaltegkeet soll belount ginn:



- **Kräiz** an der Checklëscht d'Punkten un, déi dir fir är Aktivitéit erfëllt hutt.
- Hutt dir déi **mam**  alleguerten erfëllt, an **9 oui** , hutt dir iech eng Auszeechnung verdéngt.

Hues du Froen zu der Checklëscht oder weess net wéis du déi verschidde Punkten ëmsetze solls, mell dech bei eis iwwert

nohaltegkeet@lgs.lu

Dëst Dokument geet dir net wäit genuch? Zéck net denger Checklëscht zousätzlech Punkte bäizefügen an eis däi Feedback ze schécken.





1) Message an Edukativ Ziler



E wichtige Punkt ass datt mir d'Leit och drop opmierksam maache bei wéi enge Punkte mir besonnesch probéieren op d'Nohaltegkeet opzepasst.



Fir eis Participantë méi fir Nohaltegkeet ze sensibiliséieren, erkläre mir firwat d'Nohaltegkeet bewosst an de Fokus geréckelt gëtt.

Mir bauen d'Theema Nohaltegkeet och an de Programm an.

z.B. ee Planspill mat Nohaltegkeetsziler, ee Rallye mat Froen zum Thema Waasser, mat nohaltege Materialien oder Offall bastelen... Fro bei eise Partner wéi der ONGD "Guiden a Scouten fir eng Welt" no oder kuck an der Aktivitéitsbox.



Mir klären d'Participanten iwwert déi Punkten op, déi mir bewosst am Konzept vun der Nohaltegkeet ëmgesat hunn.

z.B. firwat mir esou akafen, firwat mir bei den nächste Bäcker ginn an/oder si gefrot hunn Dëppercher mat op de Camp ze bréngen.

Mir bannen d'Participantë mat an a lauschteren hinne bei hire Wënsch an Ureegungen zum Thema Nohaltegkeet no.



2) Transport



Fir den Trafik op de Stroossen ze reduzieren an onnéideg Emissionen ze vermeiden, recommandéiere mir, sech mat nohaltegen Transportméiglechkeeten ze beschäftegen.



Mir hunn eis ob Mobilitéit.lu renseignéiert, wéi ee mam öffentlechen Transport kann op d'Aktivitéit kommen an des Informatiounen un d'Participantë weider ginn.

Ab den Avex, kann een sech iwwerleeën ob en Hike oder e Rallye eng Méiglechkeet ass fir d'Distanz tëscht dem noosten Arrêt ze iwwerbrécken.

Mir berécksiichtegen den öffentlechen Transport bei der Auswiel vum Chalet oder vun der Campplaz.



Mir hunn d'Horaire vun eiser/eisen Aktivitéit(en) den Horairë vum öffentlechen Transport ugepasst.



Mir organiséieren am Virus, eventuell scho bei der Umeldung, Fuergemeinschaften fir op d'Aktivitéit.

Mir gesi Velostänneren oder eng Alternativ dozou vir.



3) Ravi plangen



Fir de Ravi kënnen nohalteg ze gestalten ass eng besonnesch gutt Virbereedung néideg.



Mir schreiwen d'Dëppercher (fir Ravi-Reschter) op d'Paklëscht vun de Participanten.

Mir informéieren eis iwwert den nächste Bäcker, Metzler, Bauer, Mëllechtankstell etc.



Mir informéieren eis iwwert nohalteg a fair Labelen.

Mir informéieren eis bei déi jeeweileg Butteker, wéi eng Méiglechkeeten et gi fir z.B.: Bestellungen oder gréisser Quantitéiten ouni Verpackung ze kréien.



Mir stellen een equilibréierte Menü op a beméien eis fir Déiereproduiten souwéi exotesch Produiten ze reduzéieren.

Mir passen de Menü un d'Saison un.

z.B. Keng Kürbiszopp am Summer, keng Äerdbier am Wanter, etc.



4) Ravi akafen



Mir probéiere besonesch beim Akaf Verpackungen ze reduzéieren a recycléierbar Materialien ze kafen. Dëst gëtt méi einfach, wann s du genuch Zäit bei der Virbereedung aplangs.



Mir kontrolléiere virum Akafen nach eng Kéier wéi vill Leit tatsächlech matginn an ob nach Léit sech ofgemellt hunn. Doropsinn ajustéiere mir d'Quantitéiten

Mir kafen de Ravi fir déi ganz Aktivitéit net op eemol an, sou kënne mir d'Akafsquantitéiten deem upassen, wat reell consomméiert gëtt. (Bei Aktivitéiten iwver méi Deeg.)

z.B. Brout gëtt oft ze vill kaf oder mir kafen haltbar Liewensmëttel wéi z.B. UHT Mëllech.



Mir gestalten de Menü sou, datt mir d'Rechter spéider verwäerte kënnen.

Mir kafen eis Liewensmëttel an der Théik a grouse Quantitéiten.



Mir gi mat Ökotuten, Kartongkëschten, Uebst- a Geméisnetzer an / oder Stoffkierf akafen.

Mir loossen eis Liewensmëttel an eegen Dëppercher oder Tute fëllen (Metzler, Kéisthéik, Bäcker asw.)

Ënner anerem huele mir eis Eeërkëschte mat a kafen eis Eeër, wa méiglech en vrac.



Mir kafe sou wäit et geet saisonal, lokal, bio an/oder fair an.

Mir kafe Mehrwegfläschchen a mir gi se och rëm zeréck.



Mir drénke Krunnewaasser a kafe kee Waasser a Fläschchen.



5) Ravi zoubereeden



Mir ginn eist Bescht fir Reschter ze vermeiden a passen de Ravi Plang spontan u wann trotzdeem d'Reschter ufalen.



Mir kontrolléiere virum Kachen nach eng Kéier, wéi vill Leit matiessen a kachen dann och just dat, wat mir packen.

z.B.: net eng ganz Packung Nuddele kachen, wann just eng hallef gebraucht gött.



Mir maachen ee Buffet a verdeelen d'lessen net op all eenzelen Dësch

z.B. mir stellen net op all Dësch ee Glas Gebeess, fir datt nom Weekend net sechs ugefaange Glieder iwwereg sinn.



Mir verschaffen d'Rechter vu den Deeg virdrunner a reduzéiere gläichzäiteg d'Quantitéite vun der nächster Molzecht.



Mir benotzen eis eegen Dëppercher fir Liewensmëttelreschter an evitéieren Alu-Barquetten oder ZIP-Tuten.

z.B. mir maachen och de Pakalu an der Gamelle



Mir huele Gewürzer mat op d'Aktivitéit, déi mir sowisou nach an eisem Chalet stoen hunn.



6) Hygiène



Mir passen drop op, datt déi Produiten, déi mir gebrauchen, biologesch ofbaubar sinn, schaffe ressourcëschonend a vermeide Wegwerfproduiten.



Mir benotze fir d'Spullen a Botze wäschbar Spulllumpen oder Schwämmcher amplaz där, déi ewechgehät ginn.



Participanté brénge Spulldicher vun doheem mat.



Mir ersetze Kichepabeier duerch Spulllumpen.

Mir kafen d'Seef an d'Botzmëttel am Grousse fir alleguer d'Participanten. Mir passen op, datt si ouni Déiereversich (Cruelty free) hiergestallt gi sinn.



Mir orientéieren eis beim Akaf un nohaltege Labelle wéi dem „Clever Akafen“.



Mir kafe recycléierten Toilettëpabeier.

Eis Ofwaasser fléisst an d'Kanalisation an net einfach an d'Wiss.



7) Material



Fir eng gréisser Scoutsaktivitéit brauch een eventuell Material, dat den eegene Grupp net besëtzt. Dofir hei e puer Iddië wéi een säin Ëmgang mat Material méi ekologesch gestalte kann. Brauche mir d'Material net dacks, probéiere mir et auszeléinen amplaz et ze kafen. Wa Kafe Sënn mécht, kafe mir méiglechst laangwiereg Material a passen och entspreichend drop op.



Mir orientéieren eis beim Akaf vum Material un nohaltege Labelen, wéi dem „Clever Akafen“.

Fir Material, wat mir net sou dacks brauchen, ëmfroe mir eis ob mir et bei der Gemeng, engem anere Grupp oder engem anere Veräin ausléine kënnen.

Mir kafe Material wa méiglech Second Hand (Kleinanzeigen, Social Media,...)

Wa mir speziaalt Material kafen, informéiere mir déi aner Gruppen, fir datt si d'Material bei eis léine kënnen.



Wann mol eppes futti geet, stelle mir eis d'Fro ob et iwwerhaupt muss ersat ginn. Wann jo, stellt sech d'Fro op et Sënn mécht genau dat nämmlecht ze kafen oder ob et eng méi nohalteg Alternativ gött. (z.B.: Inox oder Gossen Dëppe par Rapport zu Aluminium).

Mir kafe léiwer qualitativ héichwäertegt Material, wat méi laang hält.



Bei Presentatioune printe mir net fir all Participant een Handout, mee stellen déi online zur Verfügung.



Mir bastele mat Naturmaterialien oder benotzen "Offall".
Et muss méiglech sinn, déi gebastelt Saachen zum Schluss vun hirem Liewen erëm eenzel ze recycléieren.



Mir plastifizéieren näischt, wat mer nëmmen eng Kéier benotzen.



8) Recycling



Mir passen op dass mer Dreck méiglechst vermeiden an do wou dat net méiglech ass uerdentlech recycléieren.



Mir bauen ee Recycling Center op dee fir jiddereen zougängelech ass.



Mir trenne mindestens no Pabeier, Glas, Kompost, Valorlux, Superdreckschëscht a Restleches.



Mir informéieren eis Participanten, wat a wei eng Poubelle gehéiert.



Mir ginn d'eventuell lessreschter vun der Aktivitéit an eegenen Dëppercher mat heem.



9) No der Aktivitéit



Ganz nom Motto “Learning by doing” ass et ganz wichtig e Bilan ze zéien, wat gutt geklappt huet a wat nach verbessert ka ginn.



Mir organiséieren en uerdentleche Fundbüro, deen och nach eng Zäit nom Camp zougänglech ass.



Material wat säi Besëtzer net erëmfënnt, gëtt gespent / verschenkt an net einfach ewechgehäit.



Mir gesinn nom Camp e Bilan ënner Chef iwwert d'Ëmsetzung vun der Nohaltegkeet um Camp vir.



Mir zéie mat de Participanten en (dem Alter ugepassten) Bilan (oder Gespréich) iwwert d'Ëmsetzung vun den nohaltege Punkten op der Aktivitéit.





Meng Notten





Aarbechtsgrupp Nohaltegkeet

Schéck elo deng Checklëscht per Mail un

nohaltegkeet@lgs.lu

Info: chefbox.lgs.lu/desk/checklescht

